

FPSK UMS komited memasyarakatkan ilmu, kepakaran perubatan

UB 27.01.2023 P.03

KOTAKINABALU: Fakulti Perubatan dan Sains Kesihatan (FPSK) Universiti Malaysia Sabah (UMS) akan meneruskan komitmen dalam memasyarakatkan ilmu dan perubatan khususnya di Sabah.

Dekan FPSK Prof. Dr. Mohammad Saffree Jeffree berkata, FPSK menggariskan beberapa perkara bagi memastikan fakulti itu terus relevan dan sentiasa signifikan dalam arus perkembangan semasa.

Katanya, ia selari dengan aspirasi UMS 'Leading Towards Innovative Societies' yang diketengahkan oleh Naib Canselor UMS Prof. Datuk Dr. Kasim Mansor.

"FPSK akan memastikankan pembangunan aspek akademik klinikal selari dengan keperluan semasa masyarakat Sabah, selain mengukuhkan pembangunan modal insan pakar perubatan untuk dikongsi dan

dimanfaatkan oleh masyarakat.

"Pembangunan inovasi sosial melalui penyelidikan dan khidmat kepakaran fakulti juga akan diteruskan, termasuk melalui Makmal Hidup atau 'Living Lab' yang menyaksikan FPSK sebagai fakulti pertama yang melancarkannya dalam satu acara perasmian 'Rural Medicine Research Lab' di Pusat Pendidikan Perubatan Desa Sikuati Kudat pada 6 Januari lalu," katanya.

Beliau berkata demikian dalam ucapan aspirasi dan hala tuju beliau sebagai Dekan FPSK pada Majlis Perhimpunan Bulanan FPSK di Auditorium FPSK UMS di sini baru-baru ini.

Selain itu, Mohammad Saffree berkata, FPSK turut merancang pelaksanaan program khas peluang pendidikan profesional di FPSK untuk pelajar kumpulan B40 di luar bandar Sabah yang

dikenali sebagai program PROSPEK @MedicUMS.

"Kita juga mahu memperkasakan dan memantapkan lagi program kesihatan komuniti dan tanggungjawab sosial korporat (CSR) sedia ada melalui persatuan dan kelab pelajar serta kumpulan pakar perubatan FPSK yang dikenali sebagai UMS Medscot.

"FPSK juga akan melihat pendekatan baharu bagi meningkatkan libatsama alumni kepada fakulti dan masyarakat," katanya.

Terdahulu pada majlis itu, Mohammad Saffree berkongsi secara retrospektif pencapaian fakulti bagi 2022 meliputi aspek akademik dan antarabangsa, penyelidikan dan pascasiswazah, hal ehwal pelajar, jaringan industri dan masyarakat, pembangunan khidmat klinikal dan kepakaran perubatan serta pembangunan governan dan sumber manusia fakulti.